



ВЫЛЬ СІЗЕН



ОТДЕЛ
РЕЛИГИОЗНОГО
ОБРАЗОВАНИЯ

ПАВЕЛ АПОСТОЛЛЭН ФИЛИМОНЛЫ ЫСТЭМ ГОЖТЭТЭЗ

¹Павел, Иисус Христослэн пытсэтын пукисез, но Тимофей брат, гажано Филимонлы, – милемын чош ужасьлы, ²гажано Апфия сузэрлы, Архиппы, – милемын одйг удысын ужась-тыршисьлы, тынад гуртад люкаськись черк калыклы: ³Инмар Атай-мылэсь но Кузё-Инмарлэсь Иисус Христослэсь тйледлы дэлет но каньыллык сйзиськомы.

⁴Котьку вöсяськонам тонэ тодам ваисько но Инмарелы тау карисько. ⁵Уго мон кылылй ни Кузё-Инмарлы Иисуслы осконэд но вань вöсяськись калыкез яратонэд сярысь. ⁶Мон вöсяськисько милемын огкадь осконэд юн мед луоз, со тыныд мед тодытысал, Иисус Христос бордысь кыче жечлыкез асьмеос басьтйськомы. ⁷Тынад яратонэд монэ туж шумпоттйз, мылкыдме лöпкытйз, малы ке шуоно, тон пыр, брат, вöсяськисьёслэн сюлэмьёссы буйгазы.

⁸Христос бордын мон тонэ вордй бере, соин ик табере мон кышкатэк тынэсьтыд курыны быгатысал сое, мар тыныд лэсьтыны кулэ. ⁹Но мон косонэн уг, тонэ яратыса куронэн тыныд вазиськисько, – мон со, Павел, вöсяськисьёслэн валтйсьсы, нош али Иисус Христослэн нимыз понна пытсэтын пукись, ¹⁰Онисим пие пумысен мон тыныд куронэн вазиськисько. Пытсэтын пукыкум со мыным пи луиз. ¹¹Куке но со тыныд ярантэм луиз вал, нош табере со тыныд но, мыным но кулэ мурт луиз. Мон сое берен тон доры ыстйсько,

¹²аслэсьтым сюлэмме сётэм кадь луисько, но тон сое бордад кут. ¹³Мынам сое ас бордам воземе потэ вал, Зеч Ивор понна пытсэтын пукыкум, тон интые со мыным мед ужасал-тыршысал. ¹⁴Но тынэсьтыд мылкыддэ тодытэк, номыр но лэсьтэме өз поты. Тынад зеч ужед кужмысь карытэмын медаз луы, аслад зеч мылкыд каремедья лэсьтэмын мед луоз. ¹⁵Оло нош, тон сое пырак чожелы ас бордад мед карод шуыса, со кӧня ке дырлы тон дорысь кошкылйз? ¹⁶Табере со тыныд ляльчимедо өвӧл ни, ляльчилэсь-медолэсь со выльегес ини, – табере со гажано брат ини, уката ик мон понна. Нош тон понна со эшшо но дуногес. Уго тон доры со мугорын гинэ өвӧл, но Кузё-Инмар бордын улйсь агай-вын луыса лыктоз.

¹⁷Озыен, тон монэ эш шуыса лыдьяськод на ке, соку тон сое, кызьы монэ бордад кутйськод, озьы ик сое но бордад кут. ¹⁸Нош со тонэ маин ке жоже уськытйз, яке тыныд солэн пунэм тыронэз вань ке, тод, мон вылын со тырон шуыса. ¹⁹Мон, Павел, тае аслам кыным гожтйсько: мон солэсь пунэмзэ тыро, Мон уг ни вераськы, тон ачид но мыным пунэм тыроно шуыса. Быдэс улонэд понна. ²⁰Бен, брат, табере тон но монэ Кузё-Инмар понна шумпотты, Кузё-Инмар понна мынэсьтым сюлэмме буйгаты.

²¹Тон монэ кылзйськод шуыса, осконэн мон тыныд гожтйсько. Мон тодйсько, та куронэ сярыйсь но эшшо трогес лэсьтод на шуыса. ²²Ог кутскемен, мыным улон инты дася. Мон оскись-

кисько, тйляд вöсяськемдыя, Инмар монэ тйледлы "кузьмалоз" шуыса.

²³Тыныд Епафрас салам вера, Иисус Христос понна со но мон кадь ик пытсэтэ ворсамын; озьы ик салам верало Марк, Аристарх, Димас, Лука – монэн ёош ужась-тыршисьёс. ²⁴Кузё-Инмармылэн Иисус Христослэн дэлетэз тйляд духеныды валче мед улоз. Аминь.